

Buchi Panama, baluarte di Savaneta reconocí pa Gabinete Mike Eman

Prome Minister Mike Eman “Buchi ta aprecia, admira y stima pa locual el a haci pa Aruba completo”



ORANJESTAD(AAN): Na su cas na Savaneta Jose Wever alias Buchi Panama a ricibi di man di Prome Minister Mike Eman un plakkaat reconociendo asina e persona aki como un baluarte di Aruba. Durante accion di bario cu ta tuma lugar semanalmente den un bario na Aruba, un persona di e bario ta worde reconoci pa su trabaonan boluntario y di gran balor cu e ta haci di un of otro forma pa comunidad.

E biaha aki a toca honor, riba sugerencia di e bicindario mes, na Buchi Panama pa ricibi e bunita plakkaat aki. Esaki a sosode den presencia di dos yiu muhe, un nieta y demas amigo y conoci cu a yega

na su cas. Si bo bisa Buchi Panama, bo ta bisa Lifida. Buchi y Lifida ta insperabel di otro. Añanan largo Buchi ta dedica su tempo na deporte di futbol.

Ainda, na e edad di 84 año Buchi ta diariamente ocupa cu su pasion. Ora Prome Minister Eman a yega su cas, el a ricibi'e cu man habri compaña pa un sonrisa grandi. Cu wowonan briyante el a conta Prome Minister con el a lucha cu su welo, su tata y su ruman Henny. E tin grato recuerdo na e periodonan aki di su bida. Buchi Panama ta un homber hopi chaskero, pero tambe sincero y hopi directo. El a bisa Prome

Minister Eman cu su tempo ta limita y kier mira algun cos regla pa Lifida.

“Mi ta riba un overtime. Loke mi kier no ta pami, pero pa Lifida cu mester di un lupa na unda e hendenan por bin hunto y pa pone tur copa, potret y demas recuerdo”. José Francisco Wever, miho conoci como Buchi Panama, a nace na Zeewijk, a lanta na Brazil y ta biba actualmente na Savaneta. Buchi ta viudo y tabata casa cu Teresita van der Linden. For di e matrimonio aki a nace 8 yiu di cual 7 ta na bida: 5 yiu muhe y 2 yiu homber. Buchi a lanta su yiunan cu hopi respet y e

respet ey semper el a haya back. Buchi tin 22 nieto y nieta y 5 bisanieta. Buchi Panama ta pensionado dedicando su tempo na deporte di futbol pa muchanan, keto bay, na edad di 84 año. Prome Minister Eman a splica Buchi un poco di e trabao cu BoBarrio ta haci. Ta bishita habitantenan pa papia cu nan y tende kico nan kier pa nan bario. Tambe ta puntra nan pa bin cu sugerencia pa nombra un baluarte di e bario.

“Na Savaneta continuamente un number tabata resalta. Esun di Buchi Panama como un persona cu e bario ta admira, aprecia y stima pa locual el a haci. No solamente pa e bario, pero pa Aruba completo”. Buchi a hinca su tempo, energia, placa y a haci hopi sacrificio pa percura pa muchanan cu ta lanta a crece bira ciudadanonan sano den comunidad. Eman: “E deseo di pueblo cu nos a bishita ta pa reconoce Buchi como baluarte di Savaneta, di Aruba y di e muchanan cu el

ayuda, poniendo semper nan interes na prome luga”. Bou aplauso grandi Buchi a ricibi e plakkaat bon mereci. “Mi ta ricibi e plakkaat aki cu hopi honor”, el a bisa. Buchi ya tin 27 año como director di Lifida. Cu su 84 año di edad e ta sigui organiza campeonatonan internacional, busca sponsor y tantísimo otro cosnan. Tur esaki tanten cu no tin hende pa tuma over y sigui cu e trabao. Storia di Buchi ta muestra cu no ta experiencia den bida so ta forma bo, pero mas importante ta loke bo ta siña for di dje. E mucha sensibel, mal comprendia bira un homber cu a sa di uza e lesnan di bida y di e experiencia grandi cu el a biba riba lama, pa yuda muchanan di Aruba alcanza metanan grandi cu amor, disciplina y respet. “Buchi Panama”, e apodo cu Jose Wever a haya pa motibo di e odisea cu el a pasa 29 dia riba lama te yega banda di Panama, ta un number cu nunca ta worde lubida.